

小畜集

五



王黃州小畜集卷第二十一

表

爲宰臣上尊號表

爲宰臣謝御書錢樣表

謝賜御製逍遙詠祕藏詮表

爲宰臣謝賜御製詞詩表

爲宰臣謝新雕三史表

謝賜御草書詩表

謝御製重午詩表

陳情表

謝免和御製元日除夜詩表

賀正表

謝曆日表

進端拱箴表

謝賜御製月詩表

謝賜御書字樣錢表

單州謝上表

進乾明節祝聖詩表

謝衣襖表

滁州謝上表

謝加朝散大夫表

謝賜聖惠方表

為宰臣上尊號表

内外文武臣寮具官趙某等言今月二十一日共千天聽
別上尊名奉宸翰以未俞慮精誠而不至戴天就日猶懸
億兆之心伏閤叫闕寧避再三之黷謝臣等聞運行四時
者惟天之大照臨萬國者惟日之明天不宰其玄功而有
蒼旻之號日不耀於陽德而有畏愛之名是以居廣大而
罔辭處貞明而弗讓蓋功德著乎上而名號隨于下矣前
王後聖茂實英聲取譬于茲其則不遠伏惟

皇帝陛下繼天而王如日之升靜則垂堯舜之衣裳動則仗
武湯之旄鉞明堂制禮走玉帛於萬方宣室崇儒煥文章
於三代俟氣而八風從律陳詩而萬物由庚既理定以功

成尚宵衣而旰食早以兆民愛戴群后推崇率由舊章共
上徽號

陛下讓不得已俯而從之雖百姓同懽方諧歸美而一人
善下終恐近名昨者法天道以流謙敷王言而如綍謂大
道不器何假先天之言謂聖人無名豈湏惟睿之說盡除
尊號頗駭群情臣等奉詔靡遑再章請復

陛下過防滿假終未允俞守謙卦之六爻動而無悔去湯
書之七號卑不可踰遂使中外包羞軍民沮色既難移於
成命乃別獻於嘉猷共傾天誘之衷用紀日新之德著龜
叶吉靈貺同文咸願聽卑以期得請

陛下特迂鳳藻猶避鴻名固愈振於謙光奈重違於人欲

而況皇王顯號今古彝章上則尊列聖之貽謀光輝七廟
下則稱庶邦之係望威服八荒凡在含生共觀休烈豈可
執勞謙之小節廢立極之大名居軒昊之至尊慕巢由之
獨行此臣等之所未諭也

陛下之所不取也臣等不勝大願敢固請上尊號曰

法天崇道文武皇帝庶得將順謙冲之旨惟新徽懿之名
免使聖朝有茲闕典跼天跼地罔敢自安碎首糜軀期于
必遂臣等無任區區懇迫之至

爲宰臣謝御書錢樣表

臣等伏蒙聖慈賜御書三體字樣錢各一貫文者五銖新
樣貨泉將布於人間三體成文筆札互彰於天縱出爐冶

而首蒙頒賜望冕旒而共積兢榮伏惟

尊號皇帝陛下道極至玄學探衆妙宸居多暇書九府之
錢刀御筆摘華奪三辰之文彩盡真草歐行之法在方圓
肉好之中通流將遍於溥天固殊當百錫賚先霑於近位
其數且千臣等傳翫爲榮收藏至寶倚天光而悚惕對聖
作以兢慙臣無任

謝賜御製逍遙詠祕藏詮表

臣等言伏蒙聖慈賜臣等御製祕藏詮逍遙詠共四十一
卷者伏以竺乾之教所以祛色相而示真如老氏之書所
以去滋章而務清淨大不過四句偈多不出五千言始則
殊途而同歸終則枝分而派別洎乎演三乘於貝葉文字

漸多編三洞於瑤函筌蹄逾遠縱人十而已百奈暮四以
朝三自非上聖之才孰立不刊之典發揮教法允屬文明
伏惟 尊號皇帝陛下思妙玄沙心遊赤水因民設教與

天比崇知幾其神建皇王之有極恭默思道念釋老之多
歧于是詮註微言詠謌至道撮其樞要闢戶牖於法門塞
其菁英芟蕭稂於玄圃示萬機之多暇表三教之精通足
可以指迷悞於群生肩穆清於四海豈比夫劉莊蕭衍但
多佞佛之心漢武秦皇空作求僊之術自合鑄諸玉簡藏
在名山將日月以同懸與鬼神而爭奧傳于不朽垂之無
窮臣等謬列詞臣躬承聖教披堯天之雲霧已覺濡身聽
舜殿之絃歌共知忘味謹當授持讀誦抃舞懽呼少遵善

誘之心庶助無爲之化臣無任

爲宰臣謝賜御製謠詩表

臣等伏蒙聖慈宣賜喜雨謠詩共三首者天時旱暵聖慮
焦勞玄穹忽降於霧縠睿藻遂形於謠詠首蒙宣示共極
懽榮伏惟 尊號皇帝陛下軼念三農精心六義自春徂
夏稍致愆陽以日繫時不忘善禱詔近臣而遍走群望御
便殿而親錄縲囚聖感玄通天心昭荅潛驅屏翳舒張東
岱之雲暗使豐隆樹擊南山之鼓連宵泛灑率土昭蘇旱
稼勃興豐年可望緣聖情而有作奮御筆以成篇帝庸作
謠高視康哉之詠上以風化遠追皇矣之詩燦然三章誕
敷四海深形教誨特有宣傳台衡宸衷之銘彼何膚淺白

雪陽春之句空衡清新臣等救旱功微賡謠調下鏤于肌
骨敢忘作誠之詞播在管絃願導移風之德臣無任

爲宰臣謝新雕三史表

臣某等言伏蒙聖慈賜臣等新印本三史書各一部者伏
以先帝好文校讎三史諸儒會議繇歷兩朝摸印方行頒
宣首及

中謝伏惟

尊號皇帝陛下心存稽古志在奉先念五帝三王之書具
存道德思列國兩漢之事可鑒興亡觀真本之初成先近
臣而受賜欲俾詳觀理亂起發昏蒙臣等素匪知書仰承
善誘敢不服勤舊史少副聖懷庶竊慕於格言或有裨於
大政臣等無任感天荷聖激切屏營之至

謝賜御草書詩表

臣某言今月五日伏蒙聖慈賜臣紅綾上御草書趙嘏南
亭絕句詩一首絳綃半幅霞舒舞鵲之紋宸翰三行雲遶
迴鸞之勢天恩曲被凡目榮觀佩服戰兢神魂飛越

中謝

伏惟 尊號皇帝陛下書窮八法學洞九流英斷睿謨運

玄功而多暇飛文染翰縱草聖以為娛閑裁浙水之綾爰
寫渭南之句宮中刀尺剪雲霧於赤城筆下風雷走龍蛇
於碧落遍令中使宣賜近臣豈期瑣材亦預宸眷捧持失
次傳翫增輝忻千載之遭逢極一時之榮遇讀盡二十八
字列宿韜光宣來三十六宮天香尚在豈止藏於篋笥亦
將傳付子孫堪笑二王非墨妙筆精之作如逢伯禹得金

簡王字之書感恩空救於涕洟受賜更銘於肌骨臣無任
戴天荷聖激切屏營之至

謝御製重午詩表

臣某等言伏蒙聖慈宣賜御製七言四韻重午詩一首者
天有四時成聖功也八節所以宣其氣詩有六義繫王化
也二南所以變其風至若運陰陽亭毒之功達雅頌盛衰
之理不失其正斯惟聖人

中謝伏惟

尊號皇帝陛下運應一千啓昇平之嘉會節當重午樂長
養之立功彤于詠謠播作詩什特令中使宣示詞臣降鳳
閣以光輝擗魚須而抃舞仰窺首句如當帝舜之重風載
味卒章仍念屈原之貞魄教化以被忠邪以分又何止述

浴蘭縣艾之文逞白雪陽春之麗而已哉臣等職叨掌誥
才謝言詩獻尚書而諷諫無聞徒經嘉節學離騷而淵深
罕究但拜宸章願揚治世之音永作傳家之寶無任戴天
荷聖懼呼抃蹈之至

陳情表

臣某言臣聞改過自新人臣之晚節弃瑕責效王者之舊
章謝伏念臣近自冗負再叨諫署秋蘭解佩重呼澤畔之
魂紅藥裁詩不望禁中之樹固當老於小諫日赴常參其
如親寄解梁身趣魏闕四海無立錫之地一家有懸磬之
憂以至僕馬龍鐘雜于工祝弟兄分散迫于飢寒若非內
受職名賜之實俸外求差使以救食貧則曷以養高堂垂

白之親備上國燃金之費望雲就日非無戀闕之心玉粒桂薪未有住京之計伏望

尊號皇帝陛下念臣過而能改進不因人或西垣再命於演綸或東魯且令於承乏唯中外之二任繫君親之一言干冒宸嚴臣無任僭越兢憂惴惴待罪之至

謝免和御製元日除夜詩表

臣等言伏蒙聖慈特降御製元日除夜詩四首仍令和來臣等尋時連狀奏謝兼乞免和今月七日伏奉恩旨特賜俞允者聖文絕唱天道聽卑雖違善誘之心幸獲知難之請伏惟

尊號皇帝陛下五行爲質六義游心樂天地之玄功奮皇

王之睿藻筆無停綴夜乃未央煥乎四章降於三館耀日月星辰之彩發金石絲竹之音思入杳冥乾坤無以逃其數辭包造化鬼神不能隱乎情其元日之句也藻繪王春悅萬物之資始其除夜之句也發揮天吏述四序之成功固宜隨歷數而頒於華夷與法令而懸於象魏俾夫薰絃播奏散爲化下之風蒼玉雕鐫祕作升中之典至若周滿黃竹之詠漢高大風之歌唐太宗守歲之詩陳叔達初年之作義皆無取事不足徵又若除夜藏鉤正朝放雀真爲兒戲豈近皇猷遍數前王實多慙德臣等文館待罪朝行具負幸觀四始之根源徒荷千年之際遇然而對燭龍之銜耀難炫螢光當鳳彩之來儀須藏雉尾共思閣筆同樹

降旗方傾窘蹙之誠果降矜容之命豐隆門下免爲聚響
之蚊莊叟山中甘作不鳴之鴈臣等無任感天荷聖激切
屏營之至

賀正表

臣某言伏以元正首祚景福惟新數莫莢於堯堦初生一
葉獻椒花於漢殿齊列千官式彰負宸之尊大祝如山之
壽伏惟

尊號皇帝陛下業隆三代道冠百王和玉燭以授時立功
克著振金鈴而徇路春令爰行當三元資始之期見萬國
會同之盛方物充庭而麇至上公獻壽以鳧趣日照晃旒
觀垂衣之肅穆風和象魏陳縣法之威儀詎遺率土之濱

同樂履端之候膺乾納祐與天齊休臣濫奉朝恩叨權郡
印思預華封之祝方遠彤庭新頒義氏之書空驚素髮但
荷發生之德莫酬煦育之私臣無任祝聖戴天抃蹈懽呼
之至

謝曆日表

臣某言今月四日進奏院遞到宣頭一道伏蒙聖慈賜臣
至道二年新曆日一道者王春肇啓日官爰舉於舊章帝
命遐宣守土各頒於新曆臣某謝臣聞天道無私所以運
行寒暑聖人有作所以恭授民時聿令率土之濱共樂同
文之化伏惟

尊號皇帝陛下五行爲質萬國咸寧星辰即序於堯天風